

LA USC DI LADINS – VENERDÌ 4 GENNAIO 2013

L projet “Na comunanza che empèra” tout a ejempie

L'é stat prejentà a Sulmona te n seminar de valutazion di sistemes de insegnament te lesc de mendranza

Bilinguism - Ai 3 e 4 de dezesember i insegnanc Vigilio Iori e Roberta Dellantonio de l'Olfed de la Scola Ladina de Fascia é jic a Sulmona, en provinzia de L'Aquila, per tor pèrt a n seminar de valutazion del projet LSCPI (Lengac de scolarisazion e curriculum plurilingui e interculturèi) del Minister de l'Istruzion.

“Chest projet é metù sù per responer a la indicazions de la Union europeèna sul doer de stèr ite ti neves chèdres de educazion che l'é vegnù fora dal Tratat de Lisbona – à spiegà l professor Iori – che perveit che sie na maor integrazion, no demò ti confronc de la jent che vegn da fora e che cogn se adatèr al sistem talian, ma na integrazion bilaterèla, a na vida che ence i scoles da chiò e l sistem scolastich sie bogn de ge jir encontra a chisc bec de pruma e seconda generazion de imigré. Delaite de chest projet l'é ence la valutazion de coche va i sistemes de insegnament ti lesc olache l'é mendranzes linguistiches, e per chest aon tout pèrt desche Scola Ladina de Fascia. Chest seminar era stat metù a jir ence l'an passà,

semper a Sulmona e enlouta aea tout pèrt ence autra mendranzes linguistiches ajache l'era chiamà ence i insegnanc; chest an enveze à tout pèrt demò i referenc regionèi. L'obietif del seminar l'era soraldut chel de veder i éjic de ativazion di desvalives projec te la scoles. A nos i ne à domanà belapontin de ge prejentèr chel che l'é stat fat col projet “Na comunanza che empèra” e dachelanvia aon rejonà di vèrsc che l'é stat fat enscin ades, di sistemes de valutazion e de monitoraje e de coche se laora; noscia prejentazion à abù dassen n gran bon éjit.”

Che él vegnù fora dal confront con autra realtèdes?

“Nos cognon se dir dalbon fortuné de l'autonomia spezièla che aon, ence dal pont de veduda finanzièr – à dit amò Iori. Chest projet specifich l'é stat ativà senza l didament de finanziamenc aposta, ma l fèsc pèrt de chel che l'é l'endrez normatif de noscia provinzia e l pel vegnir fat de gra ai finanziamenc che ciapa l'Olfed, che l se cruzia de enjignèr dut l materièl. Da man de autra scoles e provincies enveze l'é

stat dit che l setor finanzièr l'é chel con più problemes, se mencia i scioldi no pel vegnir fat de gregn projec. Dapò l'é da uzèr fora che la noscia l'é na realtà dassen desvaliva, nos aon la veicolarità del lengaz, e chest vel dir n muie. L'autra realtèdes à scomenzà a fèr zeche col lengaz de mendranza canche l'é jìt en doura la lege 482 del 1999 ma i laora amò n muie su la tradizions, su la cianties, su la naines, descheche fajaane ence nos al scomenz.”

Aede envià via contac con autra realtèdes de mendranza?

“Aon tout contac co la comunità grica del Salento e vedon che che pel vegnir fora – à jontà Vigilio Iori. Ades jiron inant per veder coche la va, se chierirà de slarièr fora la rees de scola ence per poder spartir i éjic de chisc projec. Noscia scola aea tacà via l'an passà na rei co la scola de Fierozzo, ma dalajà che l'é mudà l dirigent scolastich de Perjen 1, l lurier de l'an passà l'é sche jìt perdù, ades cognaron chierir de ciapèr endò ite. Coi cimbres enveze l'é più senester percheche ic à na situazion più zompa. A Luserna no l'é na scola, i bec de la populèra i

cogn jir a Lavarone e chi de la mesèna a Folgaria. Donca i bec de lengaz cimber i é de pec te la desvaliva clasc. Da chest an i à na insegnanta de mèr lenga, ma i à pecia ores de insegnament de lengaz cimber.”

Co vèl inant l projet “Na comunanza che empèra”?

“L projet va n muie ben. L'é vegnù de retorn i éjic di test Invalsi de la seconda classes de l'an passà e chi de la scoles de Soraga e de Poza

toutes ite tel projet de bilinguism e i é dassen n muie bogn, tant per chel che vèrda l talian che per la matematica. Con chest an l projet é stat envià via ence te na pruma clas a Cianacei e la maestra Roberta, che fèsc monitoraje, l'à dit che l'é na clas che laora n muie ben. Chest projet é stat prejentà l meis passà ence tel Friul a San Pietro al Natisone, olache i reiona sloven, tel chèder de n convegna su la scoles de mendranza de la provinzia de Trent.” (mci)



Da man cencia Angiolina Ponziano del Minister de l'Istruzion e responsàbola del projet LSCPI con Enea Di Ianni vize ombolt de Sulmona.